



<County: Lancashire>

<Code: L0445>

<MS reference: Preston, Lancashire County Record Office, DDF 1932>

<Text: Lease>

Pis endenter made by-twene Willm~ of Farington~ on þe ton parte & Edmund of Anderton~ on þe tother parte beris witnes þt þe forsayd Willm~ & Edmund arn acordyt to ha-byde þe ordynans & þe dome of Richart of ho3ton~ swyer & pis is hys ordynans þt þe for~sayd Edmund schal haue sufficient towrbr~ to v ascres in conabil plas wt-in þe mos of leyland wt conabil entr~ & issu & wt leue to sprede & to drye to þe profet of hym & of hys tenandys durand þe liue of þe for~sayd Willm~ & Edmund & þe for~sayd Edmund schall paye to þe for~sayd Willm~ xx d by 3er~ durand þe same terme at two tymes in þe 3er~ by eue porsions þt ys to wete at þe natiuite of Saynt John Babtyst & at þe natiuite of ovr~ lord so þt no ry3t of nather parte be lost bot stond in þe same styd þt h<sup>t</sup> dyde by-for~ þis a-cord mad & yf h<sup>t</sup> befall þt þe for~sayd xx pene rent at any terme be behynd ather in parte or in al be h<sup>t</sup> leful to þe for~sayd Willm~ for to stres in the dowfeld & þe stres for to lede a-waye & to hold tul al þe ferme be dule payt wt all þe a-rerage þis a-cord o-pon ather party wele & trule for to be holdyn þe for~sayd Willm~ & Edmund to þis endenter han set har selis mad at leyland in þe feft of saynt Elene in þe 3er~ of þe renyng of þe kyng harr~ vi after þe conquest þe first